

Na osnovu čl. 22. i 24. stav (1) Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst) i čl. 58. stav (3) i 132. tačka b) Zakona o policijskim službenicima Kantona Sarajevo ("Službene novine Kantona Sarajevo", broj 25/06), Vlada Kantona Sarajevo na Petoj sjednici, održanoj 22. marta 2007. godine, donijela je

UREDBU

O TEKSTU I NAČINU POLAGANJA ZAKLETVE POLICIJSKIH SLUŽBENIKA MINISTARSTVA UNUTRAŠNJIH POSLOVA KANTONA SARAJEVO

Član 1. (Pojam)

Ovom Uredbom propisuje se tekst zakletve i uređuje način polaganja zakletve policijskih službenika Ministarstva unutrašnjih poslova Kantona Sarajevo (u daljnjem tekstu: Ministarstvo).

Član 2. (Tekst zakletve)

Tekst zakletve glasi:

"Svečano izjavljujem da ću se u svom radu pridržavati Ustava i zakona Bosne i Hercegovine, Federacije Bosne i Hercegovine i Kantona Sarajevo, da ću dužnost i obaveze policijskog službenika vršiti savjesno i odgovorno, da ću svim svojim snagama štiti prava, slobode i sigurnost svih građana i da ću poslove i zadatke policijskog službenika odgovorno izvršavati i u slučajevima kada izvršavanje tih poslova i zadataka dovodi u opasnost moj život."

Član 3. (Vrijeme polaganja zakletve)

Policijski službenik polaže zakletvu prije početka rada na policijskim poslovima, odnosno stupanja na dužnost policajca ili mlađeg inspektora.

Član 4. (Protokol)

- (1) Polaganje zakletve se obavlja na zvaničnoj ceremoniji po prethodno utvrđenom protokolu pred ministrom unutrašnjih poslova Kantona Sarajevo (u daljnjem tekstu: ministar) i policijskim komesarom.
- (2) Protokol, vrijeme i mjesto polaganja zakletve utvrđuje ministar, na prijedlog policijskog komesara.

Član 5. (Ceremonija)

- (1) Na svečanoj ceremoniji iz člana 4. stav (1) ove Uredbe, zastava i grb Bosne i Hercegovine, Federacije Bosne i Hercegovine i Kantona Sarajevo postavljeni su na vidno mjesto, u skladu sa zakonom.
- (2) Na početku zvanične ceremonije polaganja zakletve intonira se himna Bosne i Hercegovine.
- (3) U zavisnosti od poslova i zadataka koje će obavljati, policijski službenici zakletvu polažu u uniformi, odnosno civilnoj odjeći, u stroju i obavezno u stavu "mirno".

Član 6.
(Izuzetak)

Izuzetno od odredbe člana 5. ove Uredbe, polaganje zakletve može se obaviti i na drugi način za pojedinca ili manju grupu policijskih službenika u slučaju prelaska na rad iz drugog policijskog organa, o čemu odlučuju lica iz člana 4. stav 2. ove Uredbe.

Član 7.
(Izjava)

- (1) Nakon obavljene ceremonije polaganja zakletve, policijski službenik potpisuje Izjavu o polaganju zakletve.
- (2) Jedan primjerak potpisane Izjave iz stava (1) ovog člana odmah se uručuje policijskom službeniku, a drugi primjerak potpisane Izjave se ulaže u personalni dosje policijskog službenika.

Član 8.
(Obrazac Izjave)

Obrazac Izjave o polaganju zakletve sačinat će se na bosanskom, hrvatskom i srpskom jeziku i sastavni je dio ove Uredbe.

Član 9.
(Važenje ranije izjave)

Svečana Izjava policijskog službenika data u skladu sa odredbama člana 33. stav (8) Zakona o unutrašnjim poslovima Kantona Sarajevo ("Službene novine Kantona Sarajevo", br. 22/00 -Prečišćeni tekst, 15/02, 18/02, 28/02), smatrat će se zakletvom položenom prema odredbama ove Uredbe.

Član 10.
(Ravnopravnost spolova)

Gramatička terminologija u ovoj Uredbi podrazumijeva uključivanje oba spola.

Član 11.
(Stupanje na snagu)

Ova Uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-05-4789-4/07
22. marta 2007. godine
Sarajevo

Premijer
Samir Silajdžić, s. r.